

羨君經濟與文章。緩帶輕裘古戰場。一劍縱橫九萬里。好搜山水入詩囊。
纔喜相逢又別離。纍纍紅豆惹相思。臨歧持贈無他物。剔蘚新摹烏壘碑。
惜別尊前酒一杯。蕭々征馬夕陽催。他年再會知何日。惟盼飛鴻天外來。

丁未季夏勉奉南州少佐陞政。

溫宿府知事桐城方鑒

星槎曾泛大瀛東。踏徧環球氣倍雄。此去河山千萬里。好收風月貯囊中。

南州日野強少佐來游巴楚吟此贈別。

古潭州瑯光張子璠

瀑布山飛雙白龍。游人清聽水淙淙。先生西出緣何事。爲看崑崙萬仞峯。
客星遙泛斗牛楂。傳舍相逢一笑譁。屈指計程三萬里。中原游徧又天涯。
苔蕘葱嶺界中西。萬國人文費品題。客旅莫嫌初伏熱。冰山雪海漠雲低。
海上雄風萬國師。短衣橫劍更何之。明朝揮手旗亭路。西出蒲犁過月支。

丁未季夏奉贈南州少佐兼以送別即希吟正。善化荻廬王懋勳

駐馬崑崙下。萍蹤一笑逢。亂山晴靄碧。邊樹綠陰濃。滄海成鄉夢。

新詩慰我公。壯遊歸去好。閒坐說華風。

丁未長夏奉贈南州少佐即希吟壇晒政。淮南樵菴袁鴻祐